

---Oqalulluni oqaatsit atorineqartut atuutissapput ---

Inatsisartut ammaanersiorneranni oqalugiaat

Ataqqinartuq Inatsisartut Siulittaasuut. Ataqqinartut Inatsisartunut Naalakkersuisunillu ilaasortat. Ataqqinartut Kalaallit.

Ullumikkut Inatsisartuni ukioq nutaaq aallartipparput.

Inersuarmi maani, isummanik aporaaffiusartumi ullut tamaasa tamat oqartussaaqataanerat uppersarsarneqartarpoq tamatumalu naleqassusia ersersinneqartarluni. Inersuarmi maani oqaatigineqartut aalajangiiffigineqarnermik kinguneqartarput akisussaaffillu toqqorterneqarsinnaanngilaq.

Tamat oqartussaaqataanerat - demokrati – taasivinnukartarluni krydsiliinerinnaanngilaq. Tamat oqartussaaqataanerat pappialamik taasiviinnaanngilaq, partiinut kisimi tunnganngilaq oqalugiarnermullu aamma kisimi tunnganngilaq. Tamat oqartussaaqataanerat tassaavoq inuit akornanni isumaqatigiissuteqartarnek, pissaaneqarnek ilumut unammillerneqarsinnaasartuq, aalajangiiffigisimasat oqallisigineqarsinnaaffiat nunalu ingerlanneqassasoq innuttaasunut ataqqinninneq aqqutigalugu. Tamanna tulluusimaarutissaraarput. Mianerissavarput. Aamma pisussaannartut isigisassarinnngilarput.

Nunarsuarmioqatitsinnut qiviassagutta, kiffaanngissuseq taamaattoq tamani naammattuugassaajuaannanngilaq. Nunaqarpoq innuttaasutut pisortanut qununanikuilluni illuatungiliunnissamut periarfissaqatitsinngitsunik. Nunaqarpoq katersuulluni peqatigiiffilioqqusinngitsunik, qineqqusaarnissamut killilersuisartunik, pisortanik assuarleeqqusaanngitsunik qununanilu allannguinnissamut piumasaqaateqaqqusinngitsunik. Tamanna Nunatsinni ajornanngilaq.

Tamanna soorunami tamatsinnut pisussaaffiliivoq. Naalakkersuisunut pisussaaffiliivoq. Inatsiartunut pisussaaffiliivoq. Tamatsinnut innuttaasunit tatigineqarluta sassartitaasimasunut pisussaaffiliivoq.

Assigiinngitsunik isumaqartarumaarpugut isumaqatigiittuaannarunngilagullu. Innuttaasunik qinigaasimasut akornanni assigiinngitsunik isumaqartoqanngikkaluarpat, illuatungeriillunilu oqallinneq aqqutigalugu akerleriittoqartanngikkaluarpat, tamat oqartussaaqataanerat uummaarissuujunngikkaluarpoq. Kisianni isumaqatigiinngittarnerit unittoornermut utoqqatsissutaanngisaannassapput. Isumaqatigiinngittarnerit salliutillugit Nunarput tunulliutinngisaannassavarput. Isumaqatigiinnginneq pissutigalugu ima uteriitsigalutalu mikitigilissanngilagut, suliaassarput annertoorsuaq tatigineqarluta uatsinnut tunniunneqarsimasoq, allaat puorlugu. Peqatigiilluta Nunarput ineriartortissavarput, inuiaqatigiillu iluanni iluaqutissaat aaqqiissutissaasut ujartorlugit.

Innuttaasut kiffartorniarlugit qinigaanikuuvugut. Taamaattumik Naalakkersuisut Inatsisartut ukioq manna katersuullutik aallartinneeranni assavut suleqatiserinnilluta isaappavut. Imaanngitsoq tamatigut

isumaqatigiinngittarnissaq anigorniarsarigatsigu. Imaanngilaq tamatta ataatsimut isumaqatigiittuaannassasugut piumasaqaataassasoq. Kisianni ilumoortumik suleqatigiinnissaq kissaatigalugu, immitsinnut tusaarusussuseqarluta, isumaqatiginninniarusussuseqarluta aaqqiissutissanillu qinigaaffimmi ataasiinnarmi taamaallaat atasussanik ujartuinata.

Nunattami pisariaqartinngilaa politikki tusagassiortunut katersortitsinermi ataasiinnarmi atasussaq, Facebookimiluunniit ataasiaannarluni saqqummertussaq. Nunatta pisariaqartippaa aalajangikkat kinguaariinnut tulluuttunut atasussat.

Kiffaanngissuseq akisussaaffimmik piumasaqaateqarpoq

Nunatta ineriartortinnissaa, tamattalu siunissarput eqqartortillugu, tunngaviulluinnartumik apeqqummik immitsinnut aperisariaqarpugut.

Nunaana qanoq ittoq kingulissatsinnut kingornussassiaritinniaripput?

Tassunga Naalakkersuisut akissutissaat ersarissuuvoq. Nuna ataavartumik kiffaanngissusilik nappartissavarput, nuna toqqissisimanartoq ineriartortissavarput. Nuna inuit namminneq inuunerminnut tunngasuni akisussaaffeqarlutik inuunissaminut periarfissiisoq pilersissavarput, inuunerlu kisimiilluni oqimaattorsiorfinnguleraangat avatangiisinik ikorfartuisussanik piareersimasoqartussaq.

Kiffaanngissuseq akisussaaffeqanngitsoq namminissarsiorneruvoq. Akisussaaffeqarnerlu kiffaanngissusertaqanngitsoq nakkutilliininngortarpoq. Kisianni kiffaanngissuseq akisussaaffillu tasioqatigiikkaangata, inuiaqatigiit imminnut qummut kivittussaapput.

Nuna najorusupparput suliffeqaraanni imminut akilersinnaasumik inuuneqarfiusussaq. Ilinniagaqarniaraanni imminut akilersinnaasussaq. Suliffeqarfimmik aallartisaaniaraanni inorsarfiunngitsoq, sapiisernissamut inissaqartitsisoq, sulisussamik atorfinitsitsiniaraanni, umiatsiartaarniaraanni, niuertarfittaarniaraanni, sannavittaarniaraanni torrattumilluunniit isumassarsisimagaanni sapiuffiunngitsoq.

Nuna najorusupparput imminnut pilersorsinnaasut amerliartuinnartut najugarisinnaasaat, kikkullu tamarmik tapersersoqatigiinnissaannut inissaqartitsisoq. Imaanngilaq inuk aningaasarsiat allagartaat uuttuutigalugit nalilersorneqartassasoq. Kisianni sulineq pissarsiaqarnarnerujussuusarpoq. Sulineq ataqqinaataavoq. Ulluinnarni inuunermi imaqalersitsisarpoq. Ullaakkut makinnissamut pissutissaavoq. Meeqqanut maligassiineruvoq. Inuttut peqatigiinnitsinnut nukittorsaataavoq.

Aamma nunami pilersitassatsinni kinaluunniit kiserliortussanngorlugu qimassanngilarput.

Arlarput nappaammik eqqorneqarpat, ikiorserumallugu naapinneqartassaaq. Ikiortariallit ikiussavagut. Meeraq toqqissisimanani alliartortinneqartoq, inersimasunit iliuuseqarumasunit orninneqartassaaq. Utoqqaq inuunini

sivisooq atorlugu inuiaqatigiinnik napatitseqataasimasooq, ataqqinnittumik kiinnerfigineqartassaaq. Inoqativut innarluuteqartut peqatigiinnitsinnit ajattorneqartassanngillat, akuutinneqarnissaminut piviusorsioortumik periarfissinneqartassaaq.

Inuiaat nukittuut pilersinneqartarput innuttaasut kiffaanngissuseqarlutik inuunissamut periarfissaqaraangamik. Ersarissumik piumasaqaateqartassaaq, ikiorserneqartariaqavissortavullu ikiorneqartarnissaat qulakkiissavarput. Taakkuupput tunaartarisassatut Naalakkersuisut siunniuffigisimasaat.

Takorluuisarnissamut qunusuitsuussaagut

Angusaqarusussuseq annertoq pigissavarput. Pissaaleqineq aallaavigalugu ingerlatsinissaq naammagiinnassanngilarput. Periarfissanik pilersitsioortussaagut. Amigaatigisavut kisiisa eqqartussanngilagut. Pilersissinnaasavut aamma eqqartortassavagut. Inuiaqatigiit inummut ataatsimut tunniussinnaasai kisiisa eqqumaffigissanngilagut. Inuk qanoq nukittunerulersinneqarsinnaanersoq, kiffaanngissuseqarnerulersinneqarsinnaanersoq nammineerlunilu inuunerminik ilusilersuinerulersinneqarsinnaanersoq aamma eqqumaffigalugu aperisassaagut.

Ilinniarneq pingaaruteqarluinnarpoq. Taamaattumik meeqqat atuarfiat nukittorsarneqaqqillunilu aaqqissuunneqartariaqarpoq. Naalakkersuisuni naatsorsuutigilluinnarparput meeqqat atuarfiat pillugu inatsisip malunnaatilimmik allannguivigineqarnissaa pillugu siunnersuuterput Inatsisartut ataatsimiinneranni matumani akuerineqarumaartoq. Naatsorsuutigilluinnakkatta ilaat tassaavoq sapiissuseqarluta nassuerutigissagipput ilinniarneq nerriveeqqap saanut ingilluni atuagarsornerinnaanngimmat. Meeqqat ilaasa niaqorsorlutik ilikkarnarnerutittarpaat. Ilaasa assassortarissat atorlugit ilikkarnarnerutittarpaat. Amerlanerit ilikkarnarnerutittarpaat inuttut kinaanertik naapertorlugu isigineqarlutik namminneq piginnaatsiminnik atorluaatinneqarunik.

Ilinniartitaanikkut periusiusartut tassani apeqqutaasarput. Atuagarsorlutik pikkorissut ataqqissavagut. Assassornikkut piginnaatsitik atorlugit pikkorissut ataqqissavagut. Ilinniartitaaneq qanorluunnit ittoq allanit kusanarnerusutut perroorutigisariaqanngilaq. Qanoq sivisutigisimanersoq qanorlu imaqarsimanersoq apeqqutaanngilaq. Pingaarnerpaaq tassaavoq inuup nammineq piginnaatsiminik atuilluarnissaa. Kikkulluunniit tunniussassaqarput.

Naalakkersuisut partiit amerlasuut tapersersugaannit atituumik isumaqatigiissuteqarnissaa kissaatigisaraat. Imaanngitsoq nammineq politikkerput ungavarterniaratsigu, kisianni Nunatta patajaatsumik ingerlanneqarnissaa pisariaqarmat.

Soraarnerussutisiaqarnerit pillugit aaqqissuussat, aamma ineqarnermut ilinniartitaanermullu tunngasut aaqqissuuteqqinneri, qinersinerup tullissaani nutaanik malittarisassioqqinneqassanngitsut innuttaasut naatsorsuutigisinnaasariaqarpaat. Peqqinnissaqarfik ineriartorteqqikkutsigu, suleqataasut napparsimasullu siunnerfigisimasarput patajaatsoq suunersoq aamma takusinnaasariaqarpaat. Inuutissarsioortut pitsaaneruseqarnerit, aningaasaliisartut najukkaminnilu suliffiuteqartut siumut

pilersaarusiorsinnaatitaasariaqarput. Meeqqat atuarfiat nukittorsaqqikkutsigu, ilinniartitsisut, atuartut angajoqqaallu takorluukkat tutsuiginartuusutut isigilissagunikkit, toqqissisimaneq malugisariaqarpaat.

Politikikkut isumaqatigiissuteqartarnek sanngiissusermik takutitsinerunngilaq. Inerisimassuserminguna takutitsinerusoq. Taamaattoq suleqatigiinneq sinnassaataassanngilaq. Suna tamaat isamisillugu oqallinniarnersuaq utoqqatsissutaassanngilaq. Isumaqatigiinngikkaluarluta naapeqatigiissinnaasariaqarpugut, taamaattoq aamma aalajangiinnaasariaqarpugut. Unammillernartummi siunitsinniittut utaqqiunnaangilaatigut.

Ulluinnarni inuunermi aningaasartuutit qaffakkiartuinnarput. Ilaqutariippassuit tamanna ulluinnarni inuunermi malugillualereerpaat pisiniarfinni nioqqutissanik pisiniaraangamik.

Nunarsuatsinni niuerniarfiit maanngaanniit aqussinnaanngilagut. Ukarainemi sorsuttut maanngaanniit aqussinnaanngilagut. USA-p, Israelip Iranillu akornanni eqqissiviilliortut maanngaanniit aqussinnaanngilagut. Inuussutissat akii nunanit allaneersut maanngaanniit aalajangiiffigisinnaanngilagut. Taamaattoq qanoq iliuuseqarsinnaanerluta akisussaaffimmik tiguisinnaavugut.

Taamaattumik Naalakkersuisut pissakinnerusunut siunniusimaffeqarlutik iliuuseqarfiginissaat sulissutigissavaat. Soraarninngorsimasut. Aningaasarsiakinnerusut. Ilaqutariit meerartallit. Taakkuupput aningaasanik naammattusaarinarlutik ilungersornerpaasartut. Aningaasat ataasiaannakkamik tunniussassat pissutsit tamakkerlugit aaqqiivigisinnaanngilaat. Aaqqissuusseqqinnertut ataavartussatut suliaanngilaq. Inuussutissanut akikillissutaajunnaangillat. Kisianni maannangaaq pissutsinut tigussaasumik ikiutissatut atorineqarsinnaapput.

Siunissaq ungasinnerusoq isigalugu eqqarsartarnek aalajangiusimassavarput. Inuussutissarsiutit akiisa qaffasippallaarnerat pillugu iluaqutaasussat utaqqiisaagallartumik aaqqiissutissaniinngillat. Ilinniagaqarsimasut amerlanerujartuinnartut suliffeqartitilerput. Unammilleqatigiinneq sakkortuneq. Attaveqaasersuutit pitsaannerusut. Pisortanit allaffissornikkut sullinneqarneq suli eqaannerusoq. Aningaasaqarneq ilaqutariit isertitaminnik amerlanerusunik tigummiagaqarsinnaanerannik kinguneqartussaq. Maannangaaq ikiuusersuineq pinngitsoorani aamma siunissaq pillugu aaqqissuusseqqinnermut tapertariisittariaqarput.

Taamaattumik inuussutissarsiuteqartut atugaat pillugit pitsaannerusumik sinaakkutissiuunnissaat pisariaqarpoq. Suliffeqarfiit minnerit pisariaqanngitsumik akimmiffissalorsorneqartariaqanngillat. Aallarnisaasartut isumassarsiaminnik piviusunngortitsiniartut pappiliarsornerujussuarmik piumasaqaateqarnikkut ipitittariaqanngillat. Annertuumik aningaasaliisartut saaffiginissutaat pimoorullugit, akimut ersitsumik Nunattalu soqutigisai naapertorlugit ataqqinnittumik piumasaqaateqartumik ingerlanneqartariaqarput. Najukkanilu suliffeqarfiutillit nutaanik sanaartortitsisoqassagaangat, ineriartortitsisoqassagaangat Sinerissamilu suliassanik pilersitsiortoqaraangat neqeroorteqartarnissamut pitsaannerusumik periarfissinneqartassapput.

Nunatut annertunerusumik aningaasarsiortariaqarpugut. Tamanna avaqqunneqarsinnaanngilaq.

Atugarissaarnissarput isummanik torrattunik akilerneqarneq ajorpoq. Peqqinnissaqarfik, atuarfiit, utoqqarnik kiffartuussineq, meeqqat, attaveqaasersuutit toqqissisimanerlu aningaasaqarnermik tamakkuninnga nammassisinnaasumik pisariaqartitsivoq. Taamaattumik aningaasaqarnikkut siuariartorneq oqaasersiaanngilaq nutaaq. Siuariartorneq atugarissaarnissamut aqqutissaavoq. Aningaasaqarnikkut siuariartorneq piumasaqaataavoq nammineq annertunerusumik oqartussaassuseqarnermut.

Peqqinnissaqarfik inunnik akorsisinnaasoq

Kinaluunniit napparsimalissalluni toqqaaneq ajorpoq. Peqqissuujumalluni inuuneqartoqartarpoq. Akisussaaffeqartuusariaqarpoq. Peqqinnartunik nerisoqartarpoq, aalalluarterluni imminullu paaraluni. Taamaattoq nappaammik eqqorneqariaannaasarpugut. Taamaattoqaraangat inuiaqatigiit ikiuinissamut piareersimasariaqarput.

Peqqinnissaqarfipput tatineqarsimavoq. Tamanna nalunngilarput. Atorfinitisitassarsiornerit imaannaanngittaaqat. Sulisut arpasukaarlutik sulisiaqartarput utaqqisarnerillu sivisuallaartarput. Napparsimasut amerlavallaat nalornillutik inuusariaqartarput, uffa erseqqissumik pineqarnissartik pisariaqartinnerpaallugu. Tamakkua ammasumik eqqartortariaqarpagut.

Peqqinnissaqarfiup iluani tunniusimasunik pikkorissunillu sulisoqarpugut. Taakku qutsavissaraagut. Aamma sinaakkutissanik pitsaannerusunik atugassaqartittariaqarpagut. Peqqinnissaqarfimmi qajannaatsoq sulisut aalajaassusiat kisiat toqqammavigalugu pilersinneqarsinnaanngilaq. Inuit ulapputereeqisut sulisut sukkannerusumik ulapeqqullugit piumasarisinnaanngilarput, systemi avatangiisimisut atugaat kinguussaaqqareersimappat.

Taamaattumik Naalakkersuisut sulissutigaarput peqqinnissaqarneq eqqarsaatigalugu isumaqatigiisummik annertusisamik pilersitsisoqassasoq. Atorfinitisitassarsiornerit sulisunillu atorfimminniiginnartitsisarnissaq nukittorsartariaqarpagut. Suliffiullu iluani qaffakkiartorsinnaaneq periarfissagissaarnerutittariaqarparput. Digitalimik aaqqiissutissat silatusaartumik atortariaqarpagut, ingammik nunaqarfiit avinngarusimanerusullu eqqarsaatigalugit. Nappaassuarmut kræftimut tunngasuni tulleriiarinerusumik periuseqarluni suleriaaseqarnissaq qulakkeertariaqarparput, misissueriaatsit katsorsaariaatsillu sukkannerusumik ingerlanneqartalissapput. Tarnikkut nappaatit timikkut nappaatitulli pimoorutsigalugit iliuuseqarfigisassavagut. Napparsimasoq saaffiginnippat peqqinnissaqarfimmiit inuppalaarnerusumik kiinnerfigisassavarput. Peqqinnissaqarfik pitsaasoq katsorsaarnermut tunngassuteqaannanngilaq. Toqqissisimasuunissamut aamma tunngassuteqarpoq. Napparsimasoq toqqissisimasoq. Ilaqutariit toqqissisimasut. Aamma inuiaqatigiit toqqissisimasut.

Meerartavut akisussaaffigaagut

Toqqissisimaneq politiinit, inatsisinit pisortanillu kisimi pilersinneqarneq ajorpoq. Toqqissisimaneq pilersarpoq ulluinnarni inuunitsinni.

Angerlarsimaffimmit aallaaveqarpoq. Atuarfimmi, Suliffimmi. Peqatigiiffimmi. Talittarfimmi. Pisiniarfimmi. Timersortarfimmi. Akornatsinni immitsinnut oqaloqatigeeriaasitsinni. Meerartatta, utoqqartatta, eqqaamiutta namminerlu inuttut immitsinnut akisussaaffeqartumik pissusilersortarnitsinniippoq.

Inuiaqatigiit toqqissisimasut pilersissagutsigit inuttut nammineq akisussaaffeqarnissarput aamma piumasqaataavoq. Tamanna isumaqarpoq tamatta ataasiakkaarluta akisussaaffeqartugut pisinnaatilluta taperseeqataasarnissamut. Takkuttarluta. Suliffipput paaralugu. Ilinniagaqarnitsigit. Meerartatta atuarfiliaattarnerisigit. Persuttaanermut, atornerluinermut, sumiginnaanermut naaggaartuunitsigit. Peqqissuunissatsinnut, aningaasaqarnitsigit ataatsimooqatigiinnitsinnullu akisussaaffeqartuunitsigit.

Taamatuttaaq inuiaqatigiit toqqissisimasuussappata, pisariaqarpoq inuiaqatigiittut akisussaaffeqassasugut. Tamanna ima paasisariaqarpoq, inoqativut imminnut paarisinnaajunnaarpata kisimiittussanngorlugit qimaannassanngikkigit. Tamanna isumaqarpoq napparsimasoq ikiussagipput. Meeraq illersussagipput. Utoqqaq ikorfartussagipput. Inuit innarluuteqartut sumiginnarnagit naammaginartumik inuuneqarnissaat qulakkiissagipput. Inissiat pitsaasut pilersissagigit. Ilinniartitaanermut suliffissaqarnissamullu periarfissaqartitsillutalu qulakkeerissasugut.

Inuttut nammineq akisussaassuseqarneq peqatigiillutalu akisussaassuseqarneq imminnut akerleriissuunngillat. Imminnunuku tapertariittussat. Pisortat akisussaaffik kisimik tamaat tigugaluarpasuk, inuup nammineq inuunerminik ilusilersuiffissaraluanik arsaassavarput. Ataatsimooqatigiinneq aanngassagaluarpat, sanngiinnertavut kisimiittunngorlugit qimattussaavagut.

Naalakkersuisut kissaatigaarput inuiaqatigiit inuit ataasiakkaat iluatsittumik inuuneqalernissamut kiffaanngissuseqarlutik inuuffigisinnaasaannik pilersitsissasugut. Minnerunngitsumik inuiaqatigiit pilersissavagut ikiorneqarnissamut pisariaqartitsisoqalertillugu ikiorserneqarnissamut inissaqartitsisunik. Inuiaqatigiit uummatigissut, ajunngitsumik siunertaqartut taamaattussaapput.

Pissutsit isigissagaanni, inuiaqatigiittut imminut qiviartariaqarpugut. Tassunga ilaapput meeqqat angerlarsimaffimminiit avataanut inissinneqartartut. Meeqqat angajoqqaat akisussaaffigaat, taamaattoq tamatta peqatigiilluta akisussaaffigaarput toqqissisimasumik peroriartornissamut sinaakkutissat pilersissallugit.

Meeraq angerlarsimaffimminiit avataanut inissinneqaraangat, taamatut aalajangiisarneq imaannanngitsorsuuvoq. Ilaannikkulli pisariaqartarpoq. Meeqqamut iluaqutaanerususaaq salliutinneqartuaannartassaaq. Meeraq angerlarsimaffimmiitinneqartassanngilaq persuttaaffiusartumi, nakuuserfiusumi atornerluiffiusumi sumiginnaaffiusumilu. Poortornagu tamanna oqaatigisariaqarpoq. Taamaattoq aamma poortornagu nassuerutigisariaqarparput meeqqanik angerlarsimaffiit avataanut inissiisarnerit amerlavallaarujussuartut.

Inuiaqatigiittut ajornartorsiutaavoq annertoorsuaq. Angerlarsimaffiup avataanut inissiisarnerit inuttut aamma

anigaasatigut akisusaqaat. Meeqqanik inuusuttunik kommuneqarfinnilu anigaasaqarnermik suliaqartuusut tamanna ilisimalluarpaat. Kommuneqarfiit suulluunniit kissaatiginngilaat angerlarsimaffiit avataannut inissiisarnerit amerlanerulissasut. Paarlattuanik kissaateqaraluarput. Anigaasaqarnermik tamanna aamma attuumassuteqarpoq, kisianni anigaasaqarnek pillugu nalilersuinissaq uani pingaarnerpaajunngilaq. Pingaarnerpaajusoq tassaavoq meeraq.

Meeraq toqqissisimasumik atugaqartariaqarpoq. Meeraq asanninnermik paaqqutarineqarnermillu misigitinneqartussaavoq. Meeraq angajoqqaqaassaaq ullaakkut makillutik akisussaaffimmik tiguisartumik. Meeraq tullissaanut anigaasarsisoqarnissaa weekendernissaaluunniit pillugu ersiortussaangilaq. Meeraq unnukut sinissinnaasariaqarpoq annilaanganani.

Nammineq immitsinnut kivittariaqarpugut. Pisariaqarluinnarpoq.

Imatut paasineqassanngilaq angajoqqaanik imaannaanngitsorsiortunik uparuartuilluta tikkuartussasugut. Ilaqutariippasuit ajornartorsiutinik oqimaatsunik atugaqarput. Atornerluinerit, nakuusernerit, tarnikkut atugarliuutit, pissakilliornerit, kingunerluutit kiserliornerullu piffissaagallartillugu qanoq iliuuseqanngikkutta angerlarsimaffik iluaniit sequtsersinnaavaat. Taamaattumik siusinnerusukkut ikiorsiisariaqarpugut. Kommuneqarfiit, peqqinnissaqarfik, paaqqinnittarfiit atuarfiillu pitsaanerusumik suleqatigiittariaqarput angajoqqaat ikiorsertarlugit nukittorsarlugillu ilaqutariit toqqissisimanartumik sinaakkuteqartinnissaat qulakkiissagutsigu.

Inuttut aamma akisussaaffeqarpoq.

Kiffaanngissuseq pillugu suaarutiginnittoqarsinnaanngilaq nammineq qitornarisanut akisussaaffik minissimagaanni. Angajoqqaatut pisinnaatitaaffik kimigiiserutigineqarsinnaanngilaq qitornamut nammineq pisussaaffiit pimoorussimanngikkaanni. Aamma inersimasut aserortigaannut tamanut inuiaqatigiit iluarsartuussisussatut naatsorsuutigineqarsinnaanngillat, nammineq piviusoq nipituumik nassuerutigeqqaanngikkutsigu akisussaaffimmillu tiguisoqarnissaa piumasaqaatigalutigu.

Meeqqat systemip pigisarinngilai. Meeqqat sagsmappip pigisarinngilai. Meeqqat tassaapput inuit uumassusillit, uumatillit, neriunnermik peqartartut siunissaqartullu.

Iliuuseqarnissaq angerlarsimaffimmiit aallaaveqartariaqarpoq. Iliuuseqarnissamullu akisussaaffik pingaarnerpaatut angajoqqaaniippoq.

Nunarsuarmi inissisimaffipput

Nunarsuarmi avatangiiserput nalorninartorsiornarnerulersimavoq. Tamanna aamma maani Nunatsinni malugaarput.

Suli USA-mut akkerliinneq aaqqiivigineqanngitsoq atugaraarput. Suleqatigiissitaq sulivoq. Oqaloqatigiinneq ingerlavoq. Tamanna ajunngilaq. Oqaloqatigiinneq pisariaqarpoq. Taamaattoq oqaloqatigiittoqassappat aamma illuatungeriilluni ataqeqatigiinneq pisariaqarpoq naatsorsuutigaaralu oqaloqatigiinneq aqutigalugu ataatsimoorfiusumik isumaqatigiissuteqarumaartoq.

Kalaallit Nunaat innuttaasa kalaallit pigaat. Siunissarput maani Nunatsinni aalajangerneqassaaq. Uagutsinnit.

Suleqatigiinnissamut, akersuunnikkut pinnani oqaloqatigiinnikkut ingerlanneqartoq aqutigalugu niueqatigiinnissamut aningaasaliiffigineqarnissamullu amnavugut. Taamaattoq Nunarput tuniniagaanngilaq, attartugassiaanngilaq, nunallu allamiut akornanni politikikkut pissaaneqarniuunnerannut misileraassutaanngilaq.

Taamaattumik alla pillugu ilumoortuusariaqarpugut.

Ukiuni makkunani nunatta nunat tamalaat akornanni alaatsinaanneqarlunilu soqutigineqaleruttorfiani, qinikkat politikikkullu aalajangersimasumik avatangiisillit eqqarsarluaqqaalaarlutik pissusilersortariaqarput. Ajoraluartumik oqartoqarsinnaanngilaq oqaloqateqartoqartarpat, isumaqartoqarlunilu taakkunannga ajoqutigisinnaasatsinnik atornerlunneqarunnaangitsut. Piffissami nalorninartorsiuffiusumi pingaaruteqartpoq sumik eqqartuineq aammalu kikkunnut anngussineq eqqarsaatigissallugu.

Pinngitsuusutut oqartoqarsinnaanngilaq, inuit ataasiakkaat Nunarput amerikamiut erfasuannik qallerlugu kagiliaralugu agguluttorlugu tamanut takoqqusaartunut peqataaneq.

Taamatut pissusilersorneq nikanarsaataavoq. Akisussaassuseqanngitsuliorneruvoq. Aamma toqqissisimannginnermik pilersitsivoq

Kinaluunniit takoqqusaartitseqataasunut taamaattunut peqataattariaqanngilaq, ingammik taakku Nunarput tiguariaannaallugu oqalutsillugit.

Manna tasaanngilaq partipolitiki aallaavigalugu qinngasaarunneq. Nunattaana sillimaniarnikkut inissisimanera pineqartoq. Innuttaasununa toqqissisimasutut misigisimanerat pineqartoq. Avataaniit tatineqarnerput annertusiartuinnartillugu, kalaaliusugut ataatsimut nipeqarnissarput aamma uani pineqarpoq.

Naalakkersuisut tassani inissisimanera ersarippoq. USA-mik oqaloqateqarnissaq ujartorparput. Taamaattoq oqaloqatigiinneq aqutissat naapertuuttut atorlugit ingerlanneqassaaq, uagullu maani najugaqartuusugut ataqqilluta, inuit ataasiakkaat Nunatsinni amerlanerussuteqartut sinniisuuffigisuusaarlugit oqaluttut aqutiginagit.

Nuna qanoq ikkaluartorluunniit nunarsuarmi maanna isigilikatsinni kisimiilluni inissisimaffeqarusunngilaq.

Aamma uagut. Taamaattumik patajaatsumik toqqammaveqarnissarput anguniarlugu sulissuugut. Danmark peqatigalugu. Nunat Avannarliit peqatigalugit. EU peqatigalugu. Canada peqatigalugu. NATO peqatigalugu, USA peqatigalugu, suleqatigisinnaasagullu nunat innarligassaangissusiannik nunallu tamalaat akornanni isumaqatigiissutit inuillu pisinnaatitaaffii pillugit ataqqinnillutillu akuerinnittut peqatigalugit. Nerisassat allagartaani allassimaannarata aamma nerrivimmi issiaqataassaagut.

Nunanut allanut politikerput eqqissisimasuussaaq. Ataqqinnippaluttuussaaq. Aamma patajaatsuussaaq.

Naalakkersuisut qanittumi EU-mut nutaamik sinaakkusiisumik isumaqatigiissuteqarput. Isumaqatigiissut siusinnerusukkut EU-mut isumaqatigiissutaasimasuniit siammasinnerullunilu ineriartornermut periusissiuerneruvoq. Isumaqatigiissummi Nunatsinnut inerisaataasinnaasut suleqatigiiffiqeqarsinnaasut amerlisarneqarput annertusarneqarlutillu. Nukissiuteqarnikkut, ilinniartitaanikkut, ineqarnikkut, avatangiisinut minnerunngitsumillu inuutissarsiutinik nutaanik inerisaanikkut suleqatigiinnerit suleqatigiissutigineqalissapput.

Ilaasortanngornissaq siunertarineqanngilaq, kisiannili siammasinnerpaamik suleqateqarnissaq anguniarneqarluni. Namminiussuseqarnerput ataqpeqatigiinnerlu suleqatigiinnermi toqqammivigineqassapput. Suleqatigiinnerup nammineeirluta pingaartitagut inuiaqatigiit ineriartornissaannik qulakkeerinnissamik siunertaqarpoq nammineeirluta pingaartitagut kissaatigullu aallaavigalugit.

Ukioq aggersoq

Ukioq aggersoq oqaatsit ingasattajaartut iliuuseqarnermik tunuliaqutaqanngitsut ukiorissanngilaat. Innuttaasut pisinnaatitaapput sammivimmut sumut ingerlassanerlutik ilimasuuteqassallutik. Inatsisartut pisinnaatitaapput siunnersuutinik pilersorneqassallutik. Naalakkersuisullu pisussaaffigaat tunniussissallutik.

Taamaattumik ukiumut aggersumut pingaarnertut neriorsuutit pingasut tikkuarusuppagut.

Siullertut, Naalakkersuisut qulakkiissavaat akisussaaffeqartumik aningaasaqarnikkut politikii ingerlatissallugu.

Aningaasaqarnerput paarissavarput, aningaasaqarnikkummi akisussaassuseqartuuneq kingulissatsinnut isumassuineruvoq. Taamaattumik soraarnerussutisiaqarnermut tunngassutilinni aaqqissuusseqqinneq suliaralugu ingerlassimavarput aammattaaq ukiumi aggersumi inuussutissarsiutilinnut akileraartarnikkut aaqqissuusseqqiinnaq aallartisarlugi ingerlataqassaagut.

Aappaattut, Naalakkersuisut atugarissaarnermut tunngasut innuttaasut inuunerannut qaninnerusut nukittorsassavagut, innuttaasummi tassani toqqaannarnerusumik inuiaqatigiit iluanni pissutsit malugisarpaat.

Peqqinnissaqarfik kivittariaqarpoq. Meeqqat ilaqutariillu siusinaartumik naapigiarneqartassapput angerlarsimaffiup avataanut inissiisarnerit ikilinerussammata. Paaqqinnittarfiit, atuarfiit ilinniarsiillu nukittorsarneqassapput, meeqqat inuusuttullu amerlanerusut iluatsittumik ingerlanissaannut periarfissat

pivusorsioortut qulakkeerniassagatsigit. Systemit systemit piinnarlugit atatinneqassanngillat. Inuinuku pineqartut.

Taamaattumik peqqinnissaqarneq pillugu annertusisamik isumaqatigiissusiorniarluta sulissuteqarpugut, nunatta isikkua, kulturerput piginnaatsivullu aallaavigalugit ingerlanneqartussamik. Ineqarnermut aaqqissuusseqqinneq nangissavarput, aserfallatsaalisassamut kinguleruttut ikilisarlugit inissiallu nutaaliaasut qulakkiissavagut. Aaqqissuusseqqinnerup tamatuma ilaqutariit isertitakinnerusut akunnannerusumillu isertitaqartartut namminneq akilersinnaasaminnik ineqarnissaat qulakkiissavaa. Meeqqat inuusuttullu ikiorneqartarnissaannut malittarisassat pisariillisarniarlugit naleqqussarlugillu suliaralugit aallartissavagut, suliassamik isumaginneriaatsit tamakkununga tunngasut pisariinnerulersinniarlugit angerlarsimaffimmilu ilaqutariinnut tamanut meeraq qitiutillugu sukkanerusumik iliuuseqartoqarsinnaanera aqputissiorniarlugu.

Suliassaq oqitsuujunnanngilaq. Kikkut tamarmik pilluatissaannik tunissutissanik agguaanissamut inissisimaffeqanngikkualarpugut. Taamaattoq pisinnaasarput pitsaanerpaq atorlugu qulakkiissavarput pissutsit sallaatsumik, ataqqinnittumik akisussaassuseqartumillu ingerlanneqassasut.

Pingajuattut, Naalakkersuisut nunarsuatsinni iliuuseqarsinnaassuserput nukittorsarniarparput, Nunatsinnilu ineriartornissamut sinaakkutissat pitsaannerusut pilersillugit.

Nammineq aalajangiisinnaanerpup annertusarneqassasoq sulissutigissavarput, kisianni tamanna innuttaasut ingiaqataaffigisinnaasaannik pissasoq, aningaasaqarnikkullu artukkiinngitsumik. Suleqatissat uatsinnik ataqqinnittut suleqatiginissaat nukittorsassavarput. Aningaasaliisartut orniginartumik neqeroorfigisassavagut, inuussutissarsiornikkut pissutsit ineriartortillugit, Kalaallillu Nunaat periarfissanut pivusorsioortumik naligiissumillu suleqataaniartunut ammasuusoq qulakkeerlugu. Oqaatigissavarpulli Nunatta innuttaannut ataqqinnissuseqanngitsunut Kalaallit Nunaat matoqqavoq.

Suliassat annikitsuunngillat. Kisianni suliassat taakku pisariaqarpup. Maani nikorfalluta aaqqissuusseqqinnissat imaannaanngitsuusut nassuerutigerusunneruagut, aaqqiissutissat piunngitsut neriorsuutigiginissaanninngaanniit.

Peqatigiilluta alloriarnissarpup tulleg

Inatsisartut ukiuat nutaaq aallartipparput pissutsit ilungersunartut nalaanni.

Kisianni ilungersunartuunerat imaanngilaq makussinnaanngikkippup.

Periarfissaqarpugut. Pikkorissorsuarnik ilaqarpugut. Pisuussutinik pinngortitameersunik peqarpugut. Tamat oqartussaaqataanerup toqqammavigalugu nukittuumik ingerlaaseqarpugut. Innuttavut atukkanut imaannaanngitsunut atugaqarnissamut sungiussisimasuupput. Kinguaariillu nutaat inuusuttut pikkorissorsuupput, taakkulu malugisariaqarpaat siunissarpup tassaannaanngimmat pisussaannaasoq, namminneq aamma ilusilersorsinnaallugu takusariaqarpaat.

Taamaattumik Naalakkersuisut ullumikkut oqariatuutaat pisariusorsuartut isigisassaanngilaq.

Akisussaaffimmik tigussaagut. Kiffaanngissuseq pillugu. Meeqqavut pillugit. Aningaasaqarnerput pillugu. Nunarsuatsinni inissisimanerput pillugu. Akornatsinni immitsinnut akisussaaffimmik tigussaagut.

Imaanngitsoq tamanna oqitsuummat. Kisianni taamatut pinissaq eqqortuummat.

Naalakkersuisuniit kissaatigaarput Inatsisartunik suleqateqarnerput pitsaasuussasoq. Sukannersumik oqallittarnissaq kissaatigaarput. Ammasumik isumaqatiginngittarnissarput kissaatigaarput. Pisinnaatilluta atituumik isumaqatigiissusiortassasugut kissaatigaarput. Nunatsinnullu siuariartortitsisussamik aalajangiisassasugut.

Innuttaasunut takutitsigu politikki aporaaffiunerinnaanngitsoq. Tamat oqartussaaqataanerat takutitsigu tassaannaanngitsoq akkerliunissamut taamaallaat pisinnaatitaaffiusoq, kisianni aamma akisussaaffimmik tiguseqataaffiusoq. Kalaallit Nunaat pilersitsigu kiffaanngissutsip ineriartorfiatut, akisussaaffimmik nammaqataaffiusoq, malunnartumik toqqissisimaaffiusoq siunissamullu ilusilersuiffiusoq.

Sioqqulluta Nunatsinnik ineriartortitsisimasunut tamanna pisussaaffigaarput. Maanna Nunatsinni najugaqartunut tamanna pisussaaffigaarput. Minnerunngitsumillu meeqqanut uagutsinnit kingornussisussanut tamanna pisussaaffigaarput.

Qujanaq.